

INUIT ATAQATIGIIT

Inatsisartuni



17. december 2018

Inatsisartut Suleriaasianni § 37 imm. 1 naapertorlugu Naalakkersuisunut apeqquq imaattoq matumuuna saqqummiuppara.

Naalakkersuisunut apeqquq:

1. Nunatsinni imaani ujaasinerit ukiut qulit ingerlanerini qanoq annertutigippat?
2. Ukiuni qulini kingullerni nunap immikkoortuini sorlarni imaani ujaasinerit ingerlanneqarnerusarpat?
3. Ukiut qulit ingerlanerini imaani ujaasinerit qanoq amerlatigisut inuunermik annaassiffiusimappat?
A. Inuit qanoq amerlatigisut annaanneqarsimappat nassaarineqarlutillu?
4. Ukiut qulit ingerlanerini imaani ujaasinerit qanoq amerlatigisut taamaatiinnarneqartarpat?
A. Inuit qanoq amerlatigisut ajunaarsimappat nassaarineqanngitsoorlutillu?
5. Imaani ajunaartoqartillugu ilaqutariit eqqugaasut qaangiinissaannut isumaginninnikkut pisortanit ikiorserneqarnissaminnut qanoq periarfissaqarpat?
6. Imaani ujaasinerit ukiumut qanoq annertutigisumik aningaasartuutaasarpat?
7. Isumannaallisaanermi atortut (GPS, VHF-Radio, puttaqutit, kalerrisaarutit, iputit il.il.) umiatsiamik pisinerimi inatsisitigut piunasaqaatigineqartalernissaannik Naalakkersuisut siunertaqarpat?
8. Imaani ajunaartarnerit pinaveersaartinniarlugit Naalakkersuisut sulissuteqarnissaminnut qanoq pilersaaruteqarpat?

(Inatsisartunut ilaasortaq Aqqa Samuelsen, Inuit Ataqatigiit)

Tungavilersuut:

Imaani ujaasisoqartillugu inuiaqatigiit akornanni tamatigut misigissutsitigut sunnersimaneqarneq ernumanerlu atuuttarpoq. Taamaattumik imaani ujaasinerit ilaqutariippasuit inuunerannut annertuumik sunniisarpoq. Pinngortitaq inuuffigisarput imaannaanngitsuvoq. Qanorluunniit isumannaallisaanermi atortut pigigaluaaraanni imaani angalatilluni navialisoqarsinnaasarpoq, ujaasinerillu ingerlanneqartarlutik. Ukiuni kingullerni imaani ujaasinerit arlallit ingerlanneqartarnerat annertunerusumik paasisaqarfigissallugu soqutiginaateqarpoq. Ajunaartoqartillugu ilaqutariit eqqugaasut qaangiiniartarnerat ukiuni arlalinni pisarpoq, tamannalu inunntu ataasiakkaanut ilaqutariinnullu kingunerlussinnaasarluni. Taamaattumik

ajunaartoqartillugu ilaqutariit eqqugaasut qaangiiniarneranni pisortat qanoq ikiuttarnersut paasisaqarfigissallugu soqutiginaateqarpoq. Imaani isumannaannerusumik angalasoqartarnissaanut Naalackersuisut anguniagaat iliuusissaallu annertunerusumik paasisaqarfigerusunnarput. Inuiaqatigiit imaani isumannaannerusumik angalasalernissaat iliuuseqarfigissallugu aammalu pilersaaruteqarfigissallugu pinngitsoorneqarsinnaangilaq. Imaani ujaasisarnerit ilaqutariit tarnikkut ikiligaasarnerisa saniatigut, imaani ujaasinerit ukiut ingerlaneranni qanoq annertutigisumik aningaasartuutaasarnerat inuiaqatigiit ilisimasaqarfigisariaqarpat.